



Møre og Romsdal
fylkeskommune

saksframlegg

Dato:	Referanse:	Vår saksbehandlar:
21.01.2020	6165/2020	Lillian Sæther

Saksnr	Utval	Møtedato
	Kultur-, næring- og folkehelseutvalet	04.02.2020
	Fylkeskommunedirektøren tilråding	13.02.2020
	Fylkesutvalet	24.02.2020

Scenario 2030 - ønska retning for utvikling av reiselivsnæringa på Vestlandet fram mot år 2030

Bakgrunn

Reiselivsnæringa er i sterk vekst, både nasjonalt og regionalt. Dette gir muligheter, men skaper også utfordringar.

Fylkeskommunane på Vestlandet og landsdelsselskapet Fjord Norge AS arbeidar for å ta ut potensialet i reiselivsnæringa. For å ta tak i utfordringane og mulighetene næringa står overfor, etablerte dei då fire fylkeskommunane på Vestlandet og Fjord Norge AS i 2018 prosjektet «Scenarier for reiselivet på Vestlandet 2030». Gjennom dette prosjektet ønska ein å kome fram til ei felles retning for utvikling av reiselivsnæringa på Vestlandet fram mot år 2030.

Litt om organisering av reiselivet på Vestlandet

Fjord Norge AS er landsdelselskapet for reiselivsnæringa på Vestlandet med hovudansvarsområde å marknadsføre regionen som reisemål internasjonalt. Dei fire fylkeskommunane på Vestlandet (per 2019) er aksjonærar i Fjord Norge AS og eig 8,9 prosent kvar av aksjane i selskapet. Samla er fylkeskommunane den største eigaren av Fjord Norge AS. Inngått partnerskapsavtale mellom fylkeskommunane og Fjord Norge AS regulerer mellom anna årleg tilskot til Fjord Norge AS. Denne avtalen vil bli reforhandla i løpet av 2020 sidan vi no er tre, og ikkje lenger fire fylkeskommunar.

Proessen bak «Scenarier for reiselivet på Vestlandet 2030»

I februar 2018 vart det lagt fram ei sak til Vestlandsrådet om delfinansiering av prosjektet «Scenario 2030». Vestlandsrådet løyvde i VR-sak 05/18 1 mill. kroner til prosjektet.

Prosjektet bestod av to delar. Det skulle utarbeidast ei nullpunktsanalyse, som så skulle danne grunnlag for utarbeiding av tre ulike scenario. Eit scenario kan mest treffande omsetjast til eit framtidsbilete, med andre ord skal eit valt scenario seie noko om ønska utvikling for næringa, og korleis næringa skal vere i år 2030.

Etter anbodskonkurranse vart oppdraget med utarbeiding av nullpunktsanalyse og tre scenario tildelt Menon Economics med 2469 Reiselivsutvikling som underleverandør.

Arbeidet har vore leia av ei styringsgruppe der dei fire fylkeskommunane var representert, Fjord Norge AS, Innovasjon Norge, destinasjonsselskap samt næringsaktørar frå ulike segment i reiselivsnæringa. Møre og Romsdal fylkeskommune har vore prosjekteigar medan Fjord Norge AS har vore prosjektleiar.

Vinteren 2018/2019 vart det arrangert innspelskonferansar i dei fire fylka med brei deltaking frå reiselivsnæringa. Innspelskonferansane danna grunnlag for utarbeiding av tre ulike scenario. For nærare presentasjon av dei tre framtidsbileta, sjå vedlagte sluttrapport «Scenarier for reiselivet på Vestlandet 2030».

Nullpunktsanalysen og dei tre forslaga til scenario vart deretter presentert på ein konferanse for næringa i Bergen i mai 2019. Etter involvering av deltakarane vart scenario 3, «Kollektiv suksess» løfta fram som det ønska framtidsbiletet. Styringsgruppa har deretter arbeidd vidare med framtidsbiletet «Kollektiv suksess» og med mellom anna ytterlegare spissing av berekraftdimensjonen. Resultatet kan kort oppsummerast slik:

Felles retning mot 2030 - Berekraft er kjernen i all utvikling av reiselivsnæringa

I framtidsbiletet «Kollektiv suksess» er berekraft førande for alle aktivitetar og opplevingar, og for korleis Vestlandet blir marknadsført som reisemål.

Visjonen er: **«Attraktivitet gjennom berekraft»**

Dette rommar attraktivitet for alle interessentar i reiselivet, ikkje berre for den besøkande, men også for

- dei som vil jobbe i reiselivet,
- lokalbefolkninga,
- storsamfunnet – politikarar, etatar, media,
- investorar

Visjonen gjer det tydeleg at det nettopp er berekraft som vil gjere oss konkurransedyktig og attraktiv som reisemål både nasjonalt og internasjonalt. Omgrepet berekraftig reiselivsutvikling er basert på Innovasjon Norge sine prinsipp for utvikling av eit berekraftig reiseliv, som er tufta på dei tre pilarane miljø, lokalsamfunn og verdiskaping.

Visjonen er konkretisert i form av 10 målsetjingar, som er meint å dekkje alle dimensjonar av berekraftsbegrepet:

1. Ingen overturisme
2. Utsleppsfri transport i regionen
3. Lange opphald
4. Heilårsarbeidsplassar (bidra til lokal økonomi)
5. Oppretthalde naturmangfald
6. Oppretthalde kulturmangfald (stadseigenskapar)
7. Styrka kunnskapsutvikling og tilgang på kompetanse
8. Verdiskapingsvekst
9. Lønsemd
10. Bidrag til berekraft i andre sektorar

I sluttrapporten for scenario 2030 har styringsgruppa konkretisert desse 10 måla med forslag til måleindikatorar og med forslag til kva offentlege styresmakter og reiselivsnæringa kan gjere, kvar for seg og saman, for å nå desse måla. Sjå vedlegg 1 for nærare utdjuping av dette.

Valt scenario inneber at berekraftsperspektivet skal danne grunnlag for alt arbeid med vidareutvikling av reiselivsnæringa i Fjord Norge-regionen. Dette er eit omfattande tverrfagleg arbeid, og ikkje noko fylkeskommunen kan gjere på eiga hand. Fylkeskommunen har likevel ei rolle i å ta initiativ og bidra til samarbeid mellom aktørane i næring og forvaltning. Fylkeskommunane gir også tilskot til ei rekkje reiselivsprosjekt på Vestlandet og eit valt framtidsbilete vil vere eit nyttig verktøy for fylkeskommunane i vurdering av slike søknader.

Fylkeskommunane på Vestlandet vil i januar/februar 2020 legge fram om lag likelydande saker til behandling i hovudutval og fylkesutval. Deretter går saka vidare til behandling i Vestlandsrådet 25. februar 2020.

Forslag til vedtak:

1. Møre og Romsdal fylkeskommune tek tilrådinga frå prosjektet «Scenarier for reiselivet på Vestlandet 2030» til orientering.
2. Møre og Romsdal fylkeskommune legg framtidsbiletet «Kollektiv suksess» og visjonen «Attraktivitet gjennom berekraft» med dei 10 konkretiserte målsetjingane, til grunn utviklinga av reiselivet i Møre og Romsdal fram mot år 2030.

Ottar Brage Guttelvik
fylkeskommunedirektør

Bergljot Landstad
regional- og næringssjef

Vedlegg

- 1 Scenario 2030 - forslag til berekraftstrategi, november 2019
- 2 Scenarier for reiselivet på Vestlandet 2030 - sluttrapport